

Il Chor Rumantsch Zug sin viseta el Signuradi

Il program da viadi dil Chor Rumantsch Zug (CRZ) cun ses puncts culminants sco p. ex. la carrada cun carr e cavagl tras las vegnas dil Signuradi, degustar bien vin, la viseta en la baselgia claustrala da Pfäfers e l'informaziun sur dalla construcziun per la punt nova sur la Tamina empermetteva bia attracziun. Cun quei program eisi reussiu a nies guid, Arthur Pajarola, d'ademplier tut ils giavischs da ses camerats dil CRZ. L'emprema fermada per in bien caffè ed ina mesaglina havein nus fatg ad Oberurnen en la «Zigerribi» tier *Liliane e Bruno Kaufmann* (anteriurs ustiers el Sport Inn a Baar). Cun in pèr bialas canzuns romontschas ha il CRZ delectau in triep audituras ed auditurs ch'eran vegni sin terrassa per tedlar nies cant. Suenten in pulit puschegn ed in bien glas vin alv havein nus cuntinuau nies viadi viers Maiavilla.

El hotel Heidihof eran las combras gia reservadas pils cantadurs dil CRZ. Sco ei para ei l'istoria «Heidi» da Johanna Spyri quasi pli bein enconuschenta el Giapun che cheu tier nus. Pli ras gruppas da Giapunes eran sin via per visitar la casa «paterna» da Heidi. Duront gentar reussescha ei da prender bien contact cun ils turists giapunes. Els contan schizun ina canzun en lur lungatg mumma per nus.

Cun carr e cavagl tras il Signuradi

Suenten gentar spetgan treis vitturins cun carr e cavagl nus per la carrada tras las vegnas dil Signuradi. Egl intern dils carrs (ch'eran serrat pervia d'in urezi) audan ins dapertut cant, sgnoccas e risadas. Quella legra tempra semantegn era duront las bialas uras da degustaziun dil bien vin alv e tgietschen. La carrada cun carr e cavagl stat a tuts en buna memoria sco legra part da quei viadi.

Gia duront la buna tscheina en l'ustria «zur Bündte» a Jenins ein tuts cuntents e da buna luna. E quei pèr da dretg suenter il retuorn el Heidihof. La sera da cumpignia cuntinua cheu cun bia cant. Igl entir repertori da canzuns sto tener neu! Per che la gula schigi buc ora



Cun carr e cavagl tras il Signuradi.

MAD

vegn era la seit dustada stediamein. Zacu denter mesanotg ed alva anflan era ils davos nunstunclenteivels lur letg ed il ruaus.

Sin viseta a Pfäfers

Suenten in bien solver transporta nies autocar ils cantadurs ch'ein tuts da buna luna a Pfäfers. Il guid, *Rudolf Good*, raquenta d'interessantas episodas e historias sur dalla claustra e sia baselgia. Tenor la legenda che vegn illustrada cun entgens maletgs egl arviul dalla baselgia ei s. Pirmin vegnius igl onn 721 cun 12 paders naven dall'insla Reichenau sur il Lag Bodan el contuorn dil Signuradi. A Marschlins, damaneivel dall'entrada en Purtenza, leva el baghegiar sia emprema claustra. Duront las lavurs ha in lennari tagliau cun la sigir en ina comba. Cheu ha ina columba alva priu ina stiala bugnada cul saung dil blessau ed ei sgulada sur il Rein vi sin in crest dall'otra vart. Leu ha la columba schau dar giu la stiala. Ils luvriers han priu quei sco segn giu da tschiel ed ein lu sedecidi da baghegiar la nova claustra a Pfäfers. La baselgia claustrala dad oz vegn datada el 17avel tschentaner ed ei tenuta el stil dall'entschatta dil baroc. Duront sia istoria da varga 900 onns ha la claustra stuiu survivor bia disvaris ed embrugls.

Las pli grondas difficultads e carplinas han ils paders giu da survetscher duront il temps dalla reformaziun. Igl onn 1838 ei la claustra vegnida secularisada ed ei dapi lu en possess dil cantun S. Gagl. Oz survescha la baselgia per survetschs divins e pervia da sia eccellente acustica oravontut era per gronds concerts da cant e musica.

Fetg impressiunai ein ils cantadurs stai dil project per la construcziun dalla nova punt sur la Tamina. La nova via e la punt sur la cavorgia dalla Tamina garanteschon egl avegnir ina segira collegiazion denter Pfäfers e Valens. Da pliras tablas d'informaziun sa mintga visitader endriescher da bia detagls sur dalla construcziun da quella gronda ovra.

Duront il gustus gentar el curtgin d'unviern dil Hotel Schloss Wartensstein savein nus guder la magnifica vesta sur la Val dil Rein e plinavon schar reviver la tura che nus havein fatg la sonda tras il Signuradi. Fetg cuntents e da buna luna e cun grond engraziament al guid ed alla suprastonza tuorna il CRZ puspei anavos el cantun Zug.

Per il Chor Rumantsch Zug:
Robert Hitz, Baar